

Salah guna logo halal kena tindakan tegas

Putrajaya: Tindakan tegas akan dikenakan terhadap kepada pihak tidak bertanggungjawab yang meletakkan tanda logo halal Jabatan Kemajuan Islam Malaysia (JAKIM) pada produk yang tidak mendapat pensijilan halal.

Menteri di Jabatan Perdana Menteri, Datuk Seri Dr Mujahid Yusof, berkata perbuatan itu adalah kesalahan di bawah Akta Perihal Dagangan 2011 dan pihaknya akan bekerjasama dengan Kementerian Perdagangan Dalam Negeri dan Hal Ehwal Pengguna (KPDNHEP) bagi penguatkuasaan undang-undang itu.

Mujahid berkata, antara pendekatan JAKIM ialah memperkenalkan aplikasi 'Verify Halal' melalui telefon pintar bagi memudahkan pengguna menyemak status halal barangan yang dijual di pasar raya.

"Melalui aplikasi itu, pengguna boleh menyemak barangan halal yang disenarai dan pihak tidak bertanggungjawab juga sukar untuk mengelirukan pengguna," katanya selepas menyertai Eco Alami Ride di Dataran Putrajaya, semalam.